

REGIONAL NEWS BULLETIN

HEADLINES (MORNING)

1. Thirsakawr hmanga India ram fang chhuaktu Vanlallawmzuala Varte chuan nimin khan Kolasib a lo thleng.
2. Environment, Forests & Climate Change Minister Pu Lalthansanga chuan Forest Department hnuaiathawktute chu physical fitness ngai pawimawh leh tan la zel turin a fuih.
3. Union Minister for Youth Affairs and Sports Dr. Mansukh Mandaviya chuan National Youth Awards ropui 2022–23 dawng thei tur-in thalai te chu tel ve a dil turin a fuih.

<><><>

LZ-A VARTE

Thirsakawr hmanga India ram fang chhuaktu Vanlallawmzuala Varte chuan nimin khan Kolasib a lo thleng a, Diakkawnah Kolasib DC leh All NGO Co-ordination Committee leh mipuiin lo hmuak a ni.

Aizawl Mission Venga cheng Pu Vanlallawmzuala Varte hian Mizoram Pollution Control Board - Mission life hmalakna hnuaiath environment thianghlim leh boruak thianghlim pawimawh zia tlangau puiin kumin January ni 25 khan Aizawl chhuahsan in Tripura a pan a. Chuta tang chuan India ram State leh UT zawng zawng tlawh kim vek in nimin hian Kolasib a lo lut a ni. A zinnaah hian State hrang hrang a Sawrkar Department hrang hrang te leh Mizo awm ve ten an lo dawngsawng thin bawk.

Pu Vanlallawmzuala Varte chuan, Thirsakawra India ram a fan chhan chu Boruak (environment) tha a awm theih nan te, Eng (power) renchem a tul thu leh faina pawimawh zia tlangau pui a nih thu a sawi a, a kalna apiangah miten an lo hlut sak avang leh him leh dam taka Mizoram alo thlen leh theih avangin Pathian leh amah duhsaktu zawng zawngte chungah lawmthu a sawi a ni.

Mission Life hi Lifestyle For Environment tih niin, environment siam that leh boruak thianghlim neih nana kawng hrang hrang a mipuite hmalakna niin, India Prime Minister Narendra Modi chuan 26th UN Climate Change Conference of the Parties (COP 26) Glasgow Scotland a neih ah khan a khawvel hriat in a chhawp chhuak hial a ni.

(Andrew Vanlalauva, Kolasib PTC)

<><><>

FORESTS

Environment, Forests & Climate Change Minister Pu Lalthansanga chuan Forest Department hnuaiathawktute chu physical fitness ngai pawimawh leh tan la zel turin a fuih.

He thu hi nimina All India Forest Sports Meet tum 27-na Raipur Chattisgarh-a hman zawh taka Mizoram Forest Department aiawh a tel chawimawina tangkapui rawn hawnte a pisa a lawmpuina hun buatsaihah a sawi a ni. Mizoram Forest Department aiawh a All India Forest Sports Meet-a kal mi 19-te hian Gold Medal 2, Silver medal 9, Bronze medal 3, a vaiin medal 14 an rawn hawn a, State leh UT a tel 39 zingah 17-na an ni pha a ni.

(Corr)

<><><>

HAND HOLDING

Chief Minister Pu Lalduhoma'n Bana-kaih Policy hnuaiath Mizoramin bung thar a kai dawn a ni, a ti.

He thu hi nimina Aijal Club-a Bana-kaih policy leh National Livestock Mission scheme kaihkawp a nih tanna hawna hunah sawiin, Pu Lalduhoma chuan tun hma lama Mizoram a sorkarna changtu party-te'n a an thil kalpui thin chu sem policy a nih thu leh sem 'era' atanga thawhrimna 'era' a Mizoram a luh tur a sawi a. Political party thenkhatte'n sum an sem thin chu mitin huapzo ni lova an party mi leh sa te duhsakna atana an hman thin thu sawiin, a hnu leh inthlanna-ah party dangin sorkarna an chan chuan sorkar hmasa ai a sum an sem tam tur thu sawi lehin chutiang boruak chuan Mizoram chu kum 40 chuang teh meuh a tuam tawh thu a sawi a. Mizoram mipuite rilru chu a painsual nasat tawh thu sawiin chuta tanga policy thar thawhrimna policy ken chu a hahthlak hle a ni, a ti.

Chief Minister chuan thawhrimna policy chu kum tam tak an vahvaihpui thu leh Mizoram mipui retheihna chuan sem lam a awn thu sawiin inthlanpui hnuhnung berah erawh mipuite'n an vote hmangin sem policy chu an vuilam ta a ni, a ti.

Pu Lalduhoma chuan Mizoram chu kalphung thar hnuai-ah thawhrim, taimak leh tih tak takna hnuai-ah a lut chho mek ni a sawiin Mizoram in archaw leh vawkehaw ringawt a lakluhna a sum kal zat chu cheng vaibelchhe 77 chuang a nih thu a sawi a, kel pawh metric tonn 49 lakluh a nih thu a sawi bawk.

Chief Minister chuan Covid-19 leh African Swine Flu-te tuartu nasa ber department chu Vety Department-a nih thu sawiin chumi atanga chhanchhuah an nih leh theihna'n Hand Holding Policy leh National Livestock Mission chu kalkawp tir a nih tak thu a sawi a. He hmalakna hnuai-ah hian a hmasa ber atan Mizoram chu intodelh tir phawt a, chu chuan Mizoram pawna thawn chhuah theih hial turin hmasawna a thlen a beisei thu a sawi bawk.

(Corr)



VETY

Animal Husbandry and Veterinary Minister Pu C. Lalsawivunga chuan kum 2023 chhunga Mizoram pawna atanga sa, bawngnhute leh artui chawh luh chu a nawlpui a chhutin cheng vaibelchhe 101 hu vel a nih thu a sawi.

He thu hi nimina Mizoram sorkar beihpui thlakna, Bana Kaih Policy leh Sorkar laipui hnuai a ran vulhtute chhawmdawlina National Livestock Mission Scheme Mizoram chhunga kaihkawp a nihna tura a khuh hawna hun Aijal Club-a buatsaihah Vety Minister chuan sawiin Mizoram chu sa, artui leh bawngnhute-ah te a la intodelh lo hle a ni a ti a. Nikum, 2023 a state pawna lam atanga Mizoram-in arsa a chawh luh zat chu metric tonne 1,309 a ni a, bawngnhute litre nuai 76, leh artui pum nuai 91 lakluh a nih bawk thu a sawi a. State dang atanga sa, bawngnhute leh artui leina atana Mizoram in sum a hman chu uiawm tham a nih thu sawiin hemi kawnga sumdawna leh eizawna kawng inhawng zau tak awm sa chu Mizoram chhunga thalai leh hemi lama a ngaihna hriate'n tih tak zeta an buaipui a ngaih thu a sawi bawk.

Pu C. Lalsawivunga chuan Vety Department-in tun hnuai-ah nasa taka hma a sawn thu leh thalai lehkhathiam leh mi thahnem ngai tak takte'n, ran vulh chu dinchhuahpui mai ni lo in an hausak pui a ni a ti a, hun lo la kal zel turah pawh beiseina eng tak nena ke pen zel tura a duh thu a sawi bawk. Vety Minister chuan Bana Kaih Policy ran vulhtute'n an hlawhtlinpui theih ngeina tur atan Animal Husbandry-a field officer-te chu ran vulhtute harsatna hrethiam tur leh an theihtawp chhuah turin a chah ngal bawk.

Pu C. Lalsawivunga chuan Mizorama ran vultu, a bik takin ar leh vawh vulhtute'n harsatna an tawh len ber chu an ranvulh hralh chhuah kawngah a ni, a ti a, market support leh market linkage tha zawk nen a sorkar in hma a lak a pawimawh thu a sawi a ni.

(Corr)



POLLUTANT RIVERS

Aizawl leh chhevel a lui pathumte chu Central Pollution Control Board-in lui tui thianghlim leh thianghlim loh tehfung a siam hmanga endikna-ah, India ram chhunga lui thianghlim lo 300 zingah telh a ni.

He thu hi Akashvani palai hnenah Mizoram Pollution Control Board-a Scientist 'C' Dr. Lalramnghaki Pachuau chuan sawiin Mizorama lui tuite thianghlim leh thianghlim loh chu a sample la a an endik thin thu leh ngun taka tehfung hrang hrang hmanga laboratory-a an endik thin thu a sawi a. Chu'ng an endikna atang chuan Central Pollution Control Board chuan India rama lui tui bawlhhlawh zual BOD level 3 miligram per litre chunglam list 300 chuang a tihchhuah zingah Mizoram a lui pathum Chite, Lawibual leh Tuikual luite chu an tel thu sawiin National Green Tribunal pawhin heng lui tui bawlhhlawh zualte hi a thenfai hna rang taka thawk turin State Sorkarte thu a pe niin a sawi bawk.

Dr. Lalramnghaki Pachuau chuan Mizoram a lui tuite a bawlhhlawh zual zel lohna atan tan lak a ngaihia sawiin tui hna thianghlim a awm zel theihna tur atan tan lak a pawimawh thu a sawi a. Mihringte chenna khawvel ngaihtuah chunga lui dunga bawlhhlawh leh leivung pah mai lova sorkar dan zam ngaih pawimawh kawnga mitinin hmasawna an neih a pawimawh takzet thu a sawi bawk.

(Corr)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihtlak leh chhiar theiha dah a ni



NATIONAL YOUTH AWARDS

Union Minister for Youth Affairs and Sports Dr. Mansukh Mandaviya chuan National Youth Awards ropui 2022-23 dawng thei tur-in thalai te chu tel ve a dil turin a fuih. He chawimawina hi mimal (kum 15 leh 29 inkar) leh pawl hrang hrangte hnenah hmasawna leh khawtlang rawngbawlina kawng hrang hrang, hriselna, mihring dikna chanvo tihhmasawn, active citizenship, leh khawtlang rawngbawlina lama hnathawh leh thawhhlawk tak takte hnenah pek a ni.

Award-ah hian medal, certificate, leh mimal hnenah cheng nuai khat leh pawl hnenah cheng nuai thum pek a ni. Video message-ah Dr. Mandaviya chuan chawimawina hi chawimawina mai ni lovin, India ram hmasawna leh mi zawng zawng huapzo chawikanna kawnga thalai hruaitute lawmman a nih thu a sawi.

